



JABATAN HAL EHWAL AGAMA ISLAM NEGERI SABAH

حياتنا خير حال لو اذنا السلام حكامنا

KHUTBAH JUMAAT PERTAMA DAN KEDUA

16 JAMADILAKHIR 1445H/ 29 DISEMBER 2023M

PERBAIKI HATI, MUHASABAH DIRI

Disediakan oleh

Bahagian Penyelidikan & Sebaran Am, Jabatan Hal Ehwal Agama Islam Negeri Sabah (JHEAINS)

Arahan kepada PTA/ PPMD/ AJK MASJID/ SURAU:

- Seksyen 97, Enakmen 3 Tahun 1995, Enakmen Kesalahan Jenayah Syariah 1995, Bahagian IV - Kesalahan Khutbah menyatakan bahawa menjadi kesalahan bagi khatib yang membaca khutbah Jumaat yang bukan disediakan, disemak atau diluluskan oleh Majlis dan boleh, apabila disabitkan, dikenakan hukuman denda tidak melebihi dua ribu ringgit atau penjara selama tempoh tidak melebihi satu tahun atau kedua-duanya sekali.
- Khatib hendaklah menyemak terlebih dahulu khutbah ini sebelum disampaikan kepada para jemaah supaya sempurna rukun dan baris agar dapat disampaikan dengan fasih dan lancar.
- Khutbah ini hendaklah dibaca oleh Imam Qariah atau Imam Rawatib yang bertugas di masjid atau surau yang berkenaan kecuali ada kebenaran khas dari Jabatan Hal Ehwal Agama Islam Negeri Sabah (JHEAINS).
- Khutbah hendaklah disampaikan pada tarikh dan masa yang ditetapkan oleh JHEAINS.
- Khatib tidak dibenarkan meminda isi perkataan dalam khutbah ini kecuali untuk menyempurnakan rukun khutbah, kesilapan ejaan dan baris pada ayat-ayat al-Quran & Hadis yang terkandung di dalamnya.
- Khutbah hendaklah disampaikan dalam tempoh 10 - 15 minit sahaja.

KHUTBAH TELAH DISEMAK

TARIKH DISEMAK : 20/12/2023

PEGAWAI PENYEMAK : 

ABD. RAZAK BIN HAMDIN
Ketua Penolong Pengarah
Bahagian Penguatkuasaan Undang-Undang Syariah
Jabatan Hal Ehwal Agama Islam Negeri Sabah



Mohon semak QR code ini jika ada sebarang cadangan penambahbaikan. Sekian, terima kasih

KHUTBAH RASMI JHEAINS

DILULUSKAN PADA : 21/12/2023

DIBACA PADA : 22/12/2023

DILULUSKAN OLEH : 

ADAM BIN ABDUL HAJ
KETUA PENOLONG PENGARAH
Bahagian Penyelidikan Dan Informa
Jabatan Hal Ehwal Agama Islam Negeri Sabah

KHUTBAH PERTAMA

الْحَمْدُ لِلَّهِ الْقَائِلِ :

يَا أَيُّهَا الَّذِينَ ءَامَنُوا اتَّقُوا اللَّهَ وَلْتَنْظُرْ نَفْسٌ مَّا قَدَّمَتْ لِغَدٍ ۖ وَاتَّقُوا اللَّهَ ۚ إِنَّ اللَّهَ
خَبِيرٌ بِمَا تَعْمَلُونَ (الحشر: 18)

أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ ، وَأَشْهَدُ أَنَّ مُحَمَّدًا عَبْدُهُ
وَرَسُولُهُ، اللَّهُمَّ صَلِّ وَسَلِّمْ وَبَارِكْ عَلَى حَبِيبِنَا وَشَفِيعِنَا مُحَمَّدٍ، أَشْرَفِ
الْأَنْبِيَاءِ وَالْمُرْسَلِينَ، وَعَلَى آلِهِ وَصَحْبِهِ أَجْمَعِينَ، وَالتَّابِعِينَ لَهُمْ بِإِحْسَانٍ إِلَى
يَوْمِ الدِّينِ.

أَمَّا بَعْدُ، فَيَا عِبَادَ اللَّهِ، اتَّقُوا اللَّهَ، وَتَزَوَّدُوا فَإِنَّ خَيْرَ الزَّادِ التَّقْوَى، فَقَدْ
فَازَ الْمُتَّقُونَ.

SIDANG JUMAAT YANG DIRAHMATI ALLAH SEKALIAN,

Saya berpesan kepada diri saya dan menyeru sidang Jumaat yang dikasihi sekalian, marilah kita meningkatkan keimanan dan ketakwaan ke hadrat Allah SWT dengan mentaati segala perintah-Nya dan menjauhi segala larangan-Nya. Mudah-mudahan hidup kita diberkati Allah SWT di dunia dan di akhirat. Marilah kita rafakkan setinggi-tinggi kesyukuran ke hadrat Allah SWT, atas kurniaan-Nya memberikan usia membolehkan kita bernafas pada hari Jumaat yang terakhir pada tahun 2023 Masihi. Sedar ataupun tidak, kita telah berada dihujung pengakhiran tahun 2023 masihi. Adakah hari yang telah berlalu kita berjaya memanfaatkannya dengan perkara-perkara yang mendekatkan diri kepada Allah SWT atau kita terlalu “asyik” mengejar hal-hal berkaitan dunia. Justeru, mimbar hari

ini akan membicarakan khutbah yang bertajuk ***“Perbaiki Hati, Muhasabah Diri”***.

HADIRIN YANG DIRAHMATI ALLAH,

Setiap manusia tanpa mengira agama, warna kulit, keturunan mahupun bangsa ini pasti akan menerima ujian. Allah SWT menguji manusia untuk mengukur tahap keimanan dan kebergantungan hamba pada Yang Maha Berkuasa. Iman bermaksud keyakinan terhadap kewujudan Allah SWT dengan hati, yang dilafazkan dengan kata-kata dan dilaksanakan dengan amalan. Keimanan kita bukan sekadar dinilai berdasarkan konsisten melakukan ibadah dan meninggalkan maksiat. Disebabkan harga iman yang terlalu bernilai, iman kita turut diukur dari sudut kedalaman atau keketekannya dan kepalsuan atau ketulenannya. Semua ukuran ini dapat diketahui menerusi sikap kita dan perkataan kita pada saat menerima ujian daripada Allah SWT. Adakah dengan ujian yang menimpa, kita mampu memperbaiki hati kita untuk terus bersangka baik kepada Allah SWT? Kadangkala apa yang lebih menggusarkan kita dengan kurniaan nikmat telah menyebabkan kita lupa kepada Allah SWT, manakala bila ditimpa ujian pula, maka barulah kita mengingati Allah semula.

Dari Abu Hurairah dia berkata bahawa; Rasulullah SAW bersabda yang bermaksud: *“Sesungguhnya Allah SWT tidak melihat kepada rupa dan harta kamu, tetapi Allah SWT melihat kepada hati dan amal kamu”*. (HR Muslim (2564))

SIDANG JUMAAT YANG DIRAHMATI ALLAH,

Dalam melakukan perjalanan panjang, kita haruslah menyempatkan diri berhenti istirehat untuk mengumpul kembali semangat dan tenaga untuk melanjutkan perjalanan. Begitu juga dalam kehidupan di dunia, kita harus

mempunyai waktu untuk muhasabah diri kita sendiri. Dengan muhasabah diri, kita akan melihat kembali perjalanan hidup kita dan berusaha untuk memperbaiki amal kita yang pincang, iman yang berpenyakit, yang bermanfaat atau yang lebih mudarat atau apakah semakin mendekat atau menjauh dari Allah SWT. Firman Allah SWT dalam surah al-Hasyr ayat 18 :

يَا أَيُّهَا الَّذِينَ ءَامَنُوا اتَّقُوا اللَّهَ وَتُنظُرْ نَفْسٌ مَّا قَدَّمَتْ لِغَدٍ وَاتَّقُوا اللَّهَ ۚ إِنَّ اللَّهَ خَبِيرٌ بِمَا

تَعْمَلُونَ ۙ ۱۸

Maksudnya: *“Wahai orang-orang yang beriman! Bertaqwalah kepada Allah (dengan mengerjakan suruhanNya dan meninggalkan laranganNya); dan hendaklah tiap-tiap diri melihat dan memerhatikan apa yang ia telah sediakan (dari amal-amalnya) untuk hari esok (hari akhirat). Dan (sekali lagi diingatkan): Bertaqwalah kepada Allah, sesungguhnya Allah Amat Meliputi Pengetahuan-Nya akan segala yang kamu kerjakan.”*

JEMAAH JUMAAT YANG DIRAHMATI ALLAH SWT,

Seseorang muslim yang lalai melakukan muhasabah pada dirinya, ia merasakan tidak ada apa yang kurang pada dirinya, sedangkan imannya semakin rapuh, ketaqwaanya semakin terhakis, solatnya tidak lagi khusyuk, amal solehnya juga perlahan-lahan mengharapkan pujian daripada manusia, semangat dakwahnya hampir-hampir padam, pengorbanannya untuk Allah SWT dan Rasul-Nya juga semakin menipis.

Ada juga manusia yang sering berlumba-lumba mengejar nama, pangkat dan harta, namun memiliki pelbagai alasan dalam menyertai perlumbaan untuk melakukan kebaikan terhadap agama Allah SWT. Tepuk dada tanya iman, adakah kebaikan yang kita lakukan sudah cukup untuk

membawa kita ke syurga? Perlumbaan dalam melakukan kebaikan tidaklah hanya tentang jumlah atau tingkat kesulitannya, malahan Allah SWT lebih melihat kepada keikhlasan dan ketulusan hati kita dalam berbuat kebaikan. Sekecil apapun kebaikan yang kita lakukan jika dilandaskan niat yang tulus kerana Allah SWT, itu lebih bernilai dihadapan-Nya. Kita juga turut diajarkan untuk tidak berasa iri hati terhadap kebaikan yang dilakukan oleh orang lain. Sebaliknya, Rasulullah SAW mengajarkan kepada kita untuk bersyukur dan mendoakan kebaikan itu berbalik kepada mereka juga. Allah SWT berfirman dalam al-Quran Surah ali- 'Imran ayat 114 yang berbunyi :

يُؤْمِنُونَ بِاللَّهِ وَالْيَوْمِ الْآخِرِ وَيَأْمُرُونَ بِالْمَعْرُوفِ وَيَنْهَوْنَ عَنِ الْمُنْكَرِ وَيُسْرِعُونَ فِي
الْخَيْرَاتِ وَأُولَئِكَ مِنَ الصَّالِحِينَ ۱۱۴

Maksudnya: *“Mereka beriman kepada Allah dan hari akhir, menyuruh (berbuat) yang makruf, dan mencegah dari yang mungkar dan bersegera (mengerjakan) berbagai kebajikan. Mereka termasuk orang-orang soleh.”*

SIDANG JUMAAT YANG DIBERKATI ALLAH SWT

Menghayati sisa-sisa beberapa hari menuju ke tahun baharu Masihi, seorang mukmin perlu lebih banyak bersyukur akan segala nikmat kurniaan Allah SWT. Apa sahaja rezeki yang diperoleh adalah atas kehendak dan kurniaan-Nya. Justeru syukur itu akan menjadikan manusia lebih tawadduk dan taat segala perintah-Nya. Dalam menterjemahkan nilai syukur, seorang mukmin itu harus lebih banyak bermuhasabah dan melihat setiap sudut hidup sebagai anugerah Allah SWT. Tidak akan bererti apapun yang dimiliki manusia, andai tidak disertakan dengan rasa syukur dan yakin ia adalah pinjaman daripada Allah SWT. Mukmin juga perlu menyedari bahawa setiap nikmat yang dikecapi, terselit rezeki orang lain yang tersembunyi. Ini kerana Allah SWT

ada kala mengurniakan rezeki seseorang melalui mukmin yang lain supaya mereka saling memberi dan berkongsi.

Dalam mencari keberkatan rezeki, jauhilah perbuatan maksiat yang akan menghitamkan hati, menutup pandangan nurani serta mengikis semua kebaikan meskipun memperoleh nikmat tersebut. Tidak ada ertinya semua kesenangan dan kenikmatan hidup jika diperoleh dengan jalan kemaksiatan mahupun dengan jalan penipuan dan kejahatan. Oleh itu dalam mencari rezeki, seseorang mukmin hendaklah sentiasa memeriksa kesilapan yang dilakukannya supaya tidak termasuk dalam kalangan mereka yang mendapat istidraj Allah SWT.

SIDANG JUMAAT DIRAHMATI ALLAH SEKALIAN!

Dalam kita menjalani kehidupan seharian, kita turut dipertemukan pelbagai karenah dan ragam kehidupan manusia. Kita juga turut dihidangkan dengan pelbagai nikmat yang melalaikan sehingga ada yang terjebak melakukan perkara yang bertentangan dengan syariat agama. Sebagai manusia, kita tidak pernah sunyi daripada berbuat salah dan dosa, namun hamba yang terbaik adalah hamba yang rajin bertaubat setelah menyedari kesilapannya. Dari Anas, Rasulullah SAW bersabda yang **bermaksud**: *“Semua keturunan Adam adalah orang yang pernah berbuat salah, dan sebaik-baik orang yang berbuat salah adalah orang yang bertaubat”* (HR Ibn Majah (4392))

Justeru jangan pernah kita berputus asa memohon keampunan dan rahmat Allah SWT. Ingatlah bahawa Allah SWT sentiasa menyayangi dan bersama orang-orang yang sentiasa bertaubat dan berusaha mendekati-Nya.

Selain daripada melakukan taubat kepada Allah SWT, kita turut disarankan agar sentiasa istiqomah dalam melakukan amal soleh meskipun sedikit, namun konsisten dengan niat yang ikhlas semata-mata ingin meraih redha Allah SWT dan bukan kerana paksaan. Amal soleh itu juga bukan hanya dilaksanakan secara bermusim atau mengharap ganjaran tertentu, apatah lagi bagi meraih pujian manusia.

SIDANG JUMAAT YANG DIKASIHI,

Hidup kita di dunia ini hanyalah sebentar. Maka hendaknya kehidupan yang singkat ini kita manfaatkan sebesar-besarnya untuk menyiapkan bekal bagi menempuh kehidupan yang kekal abadi. Barangsiapa yang bekal akhiratnya sangat banyak, pasti akan hidup bahagia di syurga bersama orang-orang soleh yang diredhai Allah SWT. Barangsiapa yang bekal akhiratnya sedikit atau bahkan kurang, pasti akan sengsara di akhirat. Mereka akan menjadi gelandangan yang mundar-mandir ke sana ke mari meminta pertolongan. Justeru khatib sekali lagi menyeru agar marilah kita sama-sama perbaiki hati dan muhasabah diri, supaya kita termasuk dalam golongan yang mendapat bimbingan dan rahmat Allah SWT.

Mimbar menitipkan beberapa peringatan;

Pertama: Muhasabah diri membolehkan kita membuka hati dan menyedari akan kesilapan dan dosa yang telah dilakukan.

Kedua : Sentiasa bersyukur dengan segala nikmat yang dikurniakan Allah SWT dan menjauhi perbuatan-perbuatan maksiat.

Ketiga : Perbanyakkan Taubat memohon keampunan Allah SWT akan kesilapan yang lalu seterusnya bersungguh-sungguh memohon taufik dan bimbinganNya agar kita menggandakan kebaikan dan meninggalkan keburukan.

Allah SWT berfirman dalam surah Maryam ayat 60:

إِلَّا مَنْ تَابَ وَءَامَنَ وَعَمِلَ صَالِحًا فَأُولَٰئِكَ يَدْخُلُونَ الْجَنَّةَ وَلَا يُظْلَمُونَ شَيْئًا ۖ ٦٠

Maksudnya: "Kecuali orang-orang yang bertaubat dan beriman serta beramal soleh, maka mereka itu akan masuk Syurga, dan mereka pula tidak dikurangkan pahala sedikitpun,"

بَارَكَ اللَّهُ لِي وَلَكُمْ بِالْقُرْآنِ الْعَظِيمِ وَنَفَعَنِي وَإِيَّاكُمْ بِمَا فِيهِ مِنَ الْآيَاتِ وَالذِّكْرِ

الْحَكِيمِ وَتَقَبَّلَ مِنِّي وَمِنْكُمْ تِلَاوَتَهُ إِنَّهُ هُوَ السَّمِيعُ الْعَلِيمُ. أَقُولُ قَوْلِي هَذَا وَأَسْتَغْفِرُ

اللَّهُ الْعَظِيمَ لِي وَلَكُمْ وَلِسَائِرِ الْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ الْأَحْيَاءِ

مِنْهُمْ وَالْأَمْوَاتِ، فَاسْتَغْفِرُوهُ إِنَّهُ هُوَ الْغَفُورُ الرَّحِيمُ.

تک س خطه کدوا

الْحَمْدُ لِلَّهِ رَبِّ الْعَالَمِينَ، وَالصَّلَاةُ وَالسَّلَامُ عَلَى سَيِّدِنَا مُحَمَّدٍ النَّبِيِّ الْأُمِّيِّ،
وَعَلَى آلِهِ وَأَصْحَابِهِ الطَّاهِرِينَ وَمَنْ تَبِعَهُمْ بِإِحْسَانٍ إِلَى يَوْمِ الدِّينِ.
أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ سَيِّدَنَا مُحَمَّدًا عَبْدُهُ
وَرَسُولُهُ.

أَمَّا بَعْدُ، فَيَا عِبَادَ اللَّهِ، اتَّقُوا اللَّهَ حَقَّ تَقَاتِهِ وَاعْلَمُوا أَنَّ اللَّهَ أَمَرَكُمْ بِأَمْرٍ عَظِيمٍ،
أَمَرَكُمْ بِالصَّلَاةِ وَالتَّسْلِيمِ عَلَى نَبِيِّهِ الْكَرِيمِ، فَقَالَ اللَّهُ تَعَالَى:
إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا عَلَيْهِ وَسَلِّمُوا
تَسْلِيمًا

اللَّهُمَّ صَلِّ عَلَى سَيِّدِنَا مُحَمَّدٍ وَعَلَى آلِ سَيِّدِنَا مُحَمَّدٍ، كَمَا صَلَّيْتَ عَلَى سَيِّدِنَا
إِبْرَاهِيمَ وَعَلَى آلِ سَيِّدِنَا إِبْرَاهِيمَ، وَبَارِكْ عَلَى سَيِّدِنَا مُحَمَّدٍ وَعَلَى آلِ سَيِّدِنَا
مُحَمَّدٍ كَمَا بَارَكْتَ عَلَى سَيِّدِنَا إِبْرَاهِيمَ وَعَلَى آلِ سَيِّدِنَا إِبْرَاهِيمَ فِي الْعَالَمِينَ إِنَّكَ
حَمِيدٌ مَجِيدٌ.

اللَّهُمَّ ارْضَ عَنِ الْخُلَفَاءِ الرَّاشِدِينَ وَعَنْ بَقِيَّةِ الصَّحَابَةِ وَالْقُرَابَةِ أَجْمَعِينَ وَعَنْ
التَّابِعِينَ وَتَابِعِي التَّابِعِينَ وَمَنْ تَبِعَهُمْ بِإِحْسَانٍ إِلَى يَوْمِ الدِّينِ وَارْضَ عَنَّا مَعَهُمْ يَا
أَكْرَمَ الْأَكْرَمِينَ.

اللَّهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ الْأَحْيَاءِ مِنْهُمْ وَالْأَمْوَاتِ.
اللَّهُمَّ أَنْزِلِ الرَّحْمَةَ وَالْبَرَكَاتِ وَالْهُدَايَةَ وَالسَّلَامَةَ وَالسَّكِينَةَ وَالصَّحَّةَ الدَّائِمَةَ عَلَيْنَا

وَعَلَىٰ مَلِكِنَا كِبَاوَه دُولِي يَغْ مَا مَوْلِيَا سِرِي قَادُوكْ بَكِينِدَا يَغْ دَفْرَتَوَانِ اَكُوغْ
وَفَخَامَةِ الرَّئِيسِ الْأَعْلَىٰ تَوَانِ يَغْ تَرَاوَتَامِ يَغْ دَفْرَتَوَانِ نَكْرِي سَابِه. وَاجْعَلِ اللَّهُمَّ هَذِهِ
الْبَلَدَةَ وَسَائِرَ بِلَادِ الْمُسْلِمِينَ آمِنَةً مُّطْمَئِنَّةً، إِنَّكَ رَءُوفٌ الرَّحِيمُ.

اللَّهُمَّ اذْفَعْ عَنَّا الْبَلَاءَ وَالْوَبَاءَ وَالْفَحْشَاءَ وَالْمُنْكَرَ وَالْمِحْنَ وَالْفِتْنَ، مَا ظَهَرَ مِنْهَا وَمَا
بَطَّنَ، مِنْ بَلَدِنَا هَذَا خَاصَّةً، وَمِنْ بُلْدَانِ الْمُسْلِمِينَ عَامَّةً، إِنَّكَ عَلَىٰ كُلِّ شَيْءٍ
قَدِيرٌ.

Ya Allah, selamatkanlah saudara-saudara kami kaum Muslimin Muslimat yang tertindas di bumi barakah khususnya Palestin, kasihanilah mereka dan limpahkan gugusan Rahmat-mu ke atas mereka. Keluarkan mereka dari kesempitan dan kesulitan serta porak perandakan kepungan musuh yang menindas mereka.

Ya Aziz Ya Jabbar, terimalah yang gugur dari kalangan saudara kami sebagai golongan syuhada yang mulia di sisi-Mu, kurniakan kesembuhan yang jatuh sakit dikalangan mereka, kurniakan keafiatan pada yang cedera.

Ya Allah, sesungguhnya kami meyakini engkau sentiasa Bersama mereka, maka hindarkan mereka daripada mara bahaya musuh yang sentiasa menentang mereka, hukumlah zionis yahudi yang melampaui batas yang melakukan kezaliman terhadap saudara kami tanpa kasihan belas. Musnahkanlah segala kekuatan yang mereka miliki, kerana mereka memang tidak berupaya melawan dan melemahkan kekuatan dan kekuasaan-Mu.

Ya Qawiyy wa Ya Qahhar, Engkau cerai beraikan ikatan antara mereka, porak perandakan kesatuan mereka serta gagalkanlah segala tipu daya serta perancangan jahat mereka khususnya puak zionis yahudi dan konco-konco yang membantu mereka.

Ya Rahman wa Ya Rahim, bantulah kami Umat Nabi Muhammad, Perbaiki serta Rahmatilah Umat Nabi Muhammad, Engkau pimpinlah dan bimbinglah kami ke jalan yang lurus yakni jalan yang engkau redai.

Ya Allah! Naungilah kehidupan kami dengan kesejahteraan, keamanan, dan keselamatan serta kurniakanlah kepada kami rezeki yang halal lagi diberkati. Hiasilah diri kami dengan sifat-sifat terpuji dan jauhi kami dari sifat-sifat yang terkeji.

Ya Allah, Jadikanlah kami dan daripada keturunan kami orang-orang yang istiqamah mendirikan solat secara berjemaah, menunaikan zakat, berpuasa dalam bulan Ramadan, mengerjakan ibadah haji, mewakafkan harta dan berinfaq pada jalan yang Engkau redai. Sesungguhnya hanya kepadaMu jua Ya Allah tempat kami mengadu dan memohon pertolongan.

رَبَّنَا آتِنَا فِي الدُّنْيَا حَسَنَةً وَفِي الْآخِرَةِ حَسَنَةً وَقِنَا عَذَابَ النَّارِ.
عِبَادَ اللَّهِ ،

إِنَّ اللَّهَ يَأْمُرُ بِالْعَدْلِ وَالْإِحْسَانِ وَإِيتَايَ ذِي الْقُرْبَىٰ وَيَنْهَىٰ عَنِ الْفَحْشَاءِ
وَالْمُنْكَرِ وَالْبَغْيِ يَعِظُكُمْ لَعَلَّكُمْ تَذَكَّرُونَ
فَاذْكُرُوا اللَّهَ الْعَظِيمَ يَذُكُرْكُمْ، وَاشْكُرُوا عَلَىٰ نِعْمِهِ يَزِدْكُمْ، وَاسْأَلُوهُ مِنْ فَضْلِهِ
يُعْطِكُمْ وَلَذِكْرُ اللَّهِ أَكْبَرُ، وَاللَّهُ يَعْلَمُ مَا تَصْنَعُونَ.

Disediakan dan diedar oleh:
Bahagian Penyelidikan dan Sebaran Am
Jabatan Hal Ehwal Agama Islam Negeri Sabah

NOTA: Teks khutbah ini mengandungi potongan ayat-ayat al-Quran dan Hadis Rasulullah SAW. Mohon jaga dengan cermat dan tidak disepahkan.

Sebarang pertanyaan atau maklum balas, sila hubungi
Unit Penerbitan, Bahagian Penyelidikan dan Sebaran Am
Jabatan Hal Ehwal Agama Islam Negeri Sabah
Tel: 088-522127 / jheains.penerbitan@gmail.com